

素問下經卷之一

山陰薛本宗道凝甫纂述

表弟余士仁元德較訂

門人程紹荃芝友

男孚爵鳴鶴

仝叅

病機大要論

素問曰夫百病皆生于六氣之變也余欲令要道必
行如桴鼓相應猶拔刺雪污工巧神聖可得聞乎
對曰審察病機無失氣宜此之謂也



曰願聞病機何如

曰諸風掉眩皆屬于肝 諸寒收引皆屬于腎 諸

氣臍鬱皆屬于肺 諸濕腫滿皆屬于脾 諸痛痺

瘡瘍皆屬于心

諸熱瞀瘵皆屬于火 諸禁鼓慄如喪神守皆屬于

火 諸逆衝上皆屬于火 諸躁狂越皆屬于火

諸病肘腫脛痠驚駭皆屬于火

諸脹腹大皆屬于熱 諸病有聲鼓之如鼓皆屬于

熱 諸轉反戾水液渾濁皆屬于熱 諸嘔吐酸暴

注下迫皆屬于熱

諸暴強直皆屬于風

諸痿項強皆屬于濕

諸病水液澄澈清冷皆屬于寒

諸厥固泄皆屬于下

諸痿喘嘔皆屬于上

故大要曰謹守病機各司其屬有者求之無者求之
盛者責之虛者責之疎其血氣令其調達而致和平
此之謂也

曰何謂五發曰陰病發于骨陽病發于血陰病發于肉陽病發于冬陰病發于夏是謂五病所發

曰何謂五亂曰邪入于陽則狂邪入于陰則痺搏陽則爲顛疾搏陰則爲瘖陽入之陰則靜陰出之陽則怒是謂五邪所亂

曰何謂五屬曰諸脉者皆屬于目諸髓者皆屬于腦諸筋者皆屬于節諸血者皆屬于心諸氣者皆屬于肺是謂五屬此四支八谿之潮汐也

曰人有八虛各何以候曰亦以候五藏也肺心有邪

其氣留于兩肘肝有邪其氣留于兩腋脾有邪其氣
留于兩髀腎有邪其氣留于兩膕凡此八虛者皆机
關之室真氣之所過血絡之所遊邪氣惡血固不得
住留住留則傷經絡骨節机關不得屈伸故痛而爲
攣也

曰願聞谿谷之會也曰肉之大會爲谷肉之小會爲
谿肉分之間谿谷之會以行營衛以會大氣孫絡谿
谷亦有所會以溢奇邪以通營衛

是故溢氣邪壅脉熱肉敗營衛不行必將爲膿內消

骨髓外破大膿留于節湊必將爲敗 積寒留舍營
衛不居卷肉縮筋肋肘不得伸內爲骨痺外爲不仁
命曰不足大寒留于谿谷也

曰願聞內外相應之要也曰風寒傷形憂恐忿怒傷
氣氣傷藏乃病藏寒傷形乃病形風傷筋脉筋脉乃
病此形氣內外之相應者也

曰願聞陰陽之類之要也曰凡病有形而不痛者陽
之類也無形而痛者陰之類也

無形而痛者其陽完而陰傷之也急治其陰無攻其

陽

有形而不痛者其陰完而陽傷之也急治其陽無攻其陰

陰陽俱動乍有形乍無形加以煩心命曰陰勝其陽此謂不表不裏其形不久

虛實寒熱論

素問曰百病之生皆有虛實論言有餘有五不足亦有五何以生之乎

對曰皆生于五藏也夫心藏神肺藏氣肝藏血脾藏形腎藏志五藏之道皆出於經隧以行血氣血氣不和百病乃變化而生是故守經隧焉

曰神有餘不足何如曰神有餘則笑不休不足則悲血氣未并五藏安定邪客于形洒淅起于毫毛未入于經絡也故命曰神之微

三陽下經 卷之一 五
曰氣有餘不足奈何曰氣有餘則喘咳上氣不足則
息利少氣血氣未并五藏安定皮膚微病命曰白氣
微泄

曰血有餘不足奈何曰血有餘則怒不足則恐血氣
未并五藏安定孫絡外溢則經有留血

曰形有餘不足奈何曰形有餘則腹脹溼漉不利不
足則四支不用血氣未并五藏安定肌肉蠕動命曰
微風

曰志有餘不足奈何曰志有餘則腹脹飧泄不足則

厥血氣未并五藏安定骨節有痛命曰微濕

註曰濕傷腎蓋濕流關節也

曰余已聞虛實之形矣不知其何以生

曰血氣者喜溫而惡寒寒則泣不能流溫則消而去之

是故陰陽相傾氣血以并氣亂于衛血逆于營血氣離居一實一虛

血并于陰氣并于陽故爲驚狂血并于陽氣并于陰乃爲炆中血并于上氣并于下心煩惋善怒血并于

下氣并于上亂而喜忘血之與氣并走于上則爲大厥厥則暴死氣復反則生不反則死

曰如是者血氣離居何者爲實何者爲虛

曰氣之所并爲血虛血之所并爲氣虛

曰人之所有者血與氣耳今乃言血并爲虛氣并爲虛是無實乎

曰有者爲實無者爲虛故氣并則無血血并則無氣冷血氣相失故爲虛焉

曰實者何道從來虛者何道從去虛實之要願聞其

故

曰夫陰與陽皆有俞會陽注于陰陰滿之外陰陽勻平以克其形九候若一命曰平人

夫邪之生也或生于陰或生于陽其生于陽者得之風雨寒濕其生于陰者得之飲食居處陰陽喜怒

曰風雨之傷人奈何曰風雨之傷人也先客于皮膚傳入于孫脉孫脉滿則傳入于絡脉絡脉滿則輸于大經脉絡之與孫脉俱輸于經血與氣并則爲實焉血氣與邪並客于分腠之間其脉堅大故曰實實者

外堅克滿不可按之按之則痛

曰寒濕之傷人奈何曰寒濕之中人也皮膚不收肌肉堅緊營血泣衛氣去故曰虛虛者聶辟氣不足按之則氣足以溫之故快然而不痛曰善

曰陰之生實奈何曰喜怒不節則陰氣上逆上逆則下虛下虛則陽氣走之故曰實矣

曰陰之生虛奈何曰喜則氣下悲則氣消消則脉虛空因寒飲食寒氣薰滿則血泣氣去故曰虛矣

曰經言陽虛則外寒陰虛則內熱陽盛則外熱陰盛

則內寒余已聞之矣不知其所由然也陽虛生外寒奈何

曰陽氣受于上焦以溫皮膚分肉之間今寒氣在外則上焦不通上焦不通則寒氣獨留于外故寒慄

曰陰虛生內熱奈何曰有所勞倦形氣衰少穀氣不盛上焦不行下脘不通胃氣熱熱氣熏胸中故內熱曰陽盛生外熱奈何曰上焦不通利則皮膚緻密腠理閉塞元府不通衛氣不得泄越故外熱

曰陰盛生內寒奈何曰厥氣上逆寒氣積于胸中而

不寫不寫則溫氣去寒獨留寒獨留則血凝泣血泣則脉不通其脉盛大以濇故中寒

曰腸胃之寒熱何以候之其爲病何如

曰臍以上皮熱腸中熱則出黃如糜胃中熱則消穀令人懸心善飢

臍以下皮寒胃中寒則腹脹腸中寒則腸鳴飧泄

胃中寒腸中熱則脹而且泄

胃中熱腸中寒則疾飢小腹痛脹

通評虛實論 上篇

素問曰何謂虛實

對曰邪氣盛則實精氣奪則虛曰善

曰何謂重實曰大熱病氣盛脉滿是謂重實

曰何謂重虛曰脉虛氣虛尺虛是謂重虛

註曰所謂脉虛者不象陰也氣虛者言無常也尺虛者行步惛然也如此者脉滑則生濇則死也

曰願聞虛實之要曰氣實形實氣虛形虛此其常也反此者病穀盛氣盛穀虛氣虛此其常也反此者病